

## Учта нарсанинг жиддийси ҳам жиддий, ҳазили ҳам жиддий



09:00 / 28.06.2022 4002

Халифа Мансурнинг вазири Ийсо ибн Мусо хотинини жуда қаттиқ яхши кўрар экан. У бир куни хотинига: «Агар сен ойдан гўзал бўлмасанг талоқсан!», деб юборди. Хотини бирдан ўрнидан туриб ҳижобига ўранди ва эрига: «Сиз мени талоқ қилиб қўйдингиз-ку!», деди.

Ийсо маҳзун бўлиб қолди. Сўнгра халифа Мансурнинг ҳузурига келиб унга бўлган воқеани айтиб бериб деди:

- Эй мўминлар амири! Агар талоқ тушган бўлса менга ҳаётдан кўра ўлим афзалроқдир!

Халифа Мансур фуқоҳоларни чақириб фатво сўради. Улар бир овоздан талоқ тушганини айтишди. Аммо Абу Ҳанифа роҳимаҳуллоҳнинг асҳобларидан бири ҳеч нарса демади. Халифа Мансур ундан сўради:

- Сен нега индамаяпсан?

У деди:

- Эй мўъминлар амири! У талоқ бўлмаган. Аллоҳ таоло: "Биз батаҳқиқ инсонни энг яхши суратда яратдик", дейди. Инсондан гўзалроқ нарса йўқ!

Мансур вазирига деди:

-Аллоҳ сени қутқарди!

Сўнгра хотинига: "Эрингга итоат қил. У сени талоқ қилмаган", деб ёзиб берди.

Афтидан талоқ калимасига енгил қараш, у билан ҳазиллашиш қадимдан бўлган экан. Фақат омма эмас, ҳатто хослар ҳам бунга мубтало бўлишган экан.

Ийсо ибн Мусо ақлли, фаҳмли инсон бўлишига, зийрак ва буюк сиёсатчи бўлишига қарамасдан шу ишни қилиб қўйган. Энди бугун бунақанги ҳолатнинг кенг тарқалганидан ажабланмасак ҳам бўлаверади!

Шарқовий айтади:

«Бир дўстим даладаги чайласида дам олишга таклиф қилди. Бордим. Далани кеча қоронғусида биринчи марта кўриб турар эдим. Ажойиб бир сакинат бор эди кечада.

Аммо шундай кечани баъзи танишларим ва дўстларим карта ўйнаб бузишди. Аллоҳга қасамки, бир соатда уларнинг оғзидан ўн мартадан ортиқ талоқ сўзи чиқди».

Азиз ўйинчилар! Уйда ўтирган мастураларда нима айб?!

Эр-хотинлик муқаддас алоқадир. Унинг риоясини қилиш лозим. Тўғри, талоқ ҳалол нарса. Аммо бу ҳалолни ўйин қилиш, уни оғиздаги сақич сингари чайнаш нотўғридир. Билмадим, уларнинг хотини ўзида қолдими, йўқми?!

Ҳадисда келишича, Расулуллоҳ соллаллоҳу алайҳи васаллам дейдилар:

«Учта нарсанинг жиддийси ҳам жиддий, ҳазили ҳам жиддий: Никоҳнинг, талоқнинг ва ражъатнинг».

**Абдулқодир Полвонов**